



Dastgan esser loschs da lur product: Andrea Badrutt (san.), igl fotograf e Felix Dietrich, igl hotelier e magna-project digl codesch «Zeitreisen», en codesch cun blers malets e l'istorgia da 47 hotels istorics.



Segnan pigl text digl codesch cun 230 paginas: Ursula Bauer e Jürg Frischknecht tgi on fatg buna labour cun metter an pled las istorgias da chels hotels da tradiziun.

FOTOS G. N. STGIER/MAD

Er aint igl Grischun vainsa da chels scazis

Barvogn: Vernissascha digl codesch da hotels istorics

DA GION NUTEGN STGIER / ANR

■ En viadi da Coira an Nagiadegna ò do l'atmosfera singulara alla vernissascha digl codesch «Zeitreisen». Chel cumpeglia betg angal igls pi interessants trogts per viandar, mabagn preschaintan igls autours er 47 hotels istorics tgi dat an Svizra. Da chels sa cattan gist 15 aint igl Grischun. Hotels istorics èn tgesas cun ena gronda tradiziun ed igls ples da chels hotels on 100 onns ed er anc daple. Manos vignan la gronda part da famiglias e chegl gist sur generaziuns. Da preschaint ins dastga prest deir tgi chels hotels reneschan e schizont prospereschan. Tar igls giasts digls hotels appartignan bagn igls giasts igls pi fidevels, dantant stema er la generaziun pi giuvna l'atmosfera particulara da chels scazis. Cun esser igls ples hotels istorics an possess dallas famiglias da hoteliers èn chellas bunas adressas tgi èn er bagn mantigneidas. Ins ò adegna puspe investo, sano e restauro igls biets e chegl intern ed extern. Tgi dat an Svizra e cunzont er an noss cantun prest 50 da chellas retgezzas conferma igl codesch «Zeitreisen» tgi è gist frestg or dalla stampareia ed è nia preschento ier cun ena culissa cun en agen character. Ainten en tren istoric tranter Coira e Barvogn è igl codesch dad Ursula Bauer e Jürg Frischknecht ed igl fotograf grischun Andrea Badrutt nia preschento. Igl codesch da 230 paginas e nundumbrevlas fotografias porta dantant er la noda da Felix Dietrich, igl hotelier digl hotel «Waldhaus», Segl, tgi è sto magnaproject da chella ediziun.

L'organisasiun dattigl siva digl 2004

Igls hotels tgi on igl dretg digl status hotels istorics dattigl naturalmaintg blers

decennis. L'organisasiun tgi segna per la reclama da chels, chella dattigl pir siva digl 2004. Cun sfiegler ainten igl codesch «Zeitreisen» ins vign pertschert tge tgesas da bellezza tgi chels hotels pi segls onns èn. Agl fotograf Andrea Badrutt da Coira è alloura er reuschia da far fotografias fitg spezialas da chels hotels e da radond 3000 fotografias ò el cun igls dus autours fatg ena schelta tgi vess pi tgunsch betg savia esser migra. Igls autours Ursula Bauer e Jürg Frischknecht documentschan an pled e maletg betg angal l'istorgia, la tradiziun e la particularitad da chels «bischus», mabagn descreivan la donna ed igl om er igls pi bels trogts per viandar da hotel tar hotel. Ultra da chegl descreivan els fitg bagn tge viadis tgi spetgan sen igls giasts er cun visitar igls hotels cuagl traffic public. Igls autours fon en viadi tras l'antiera Svizra e sa concentros pi fons èn els sen tschintg regiuns.

Da Müstair anfignen Flem

Girond da li an li per tschartger igls misteris da chels hotels istorics on la donna ed igl om er catto aint igl Grischun 15 da chels. Lagn gist dar ena pitschna survista tge hotels istorics da noss cantun tgi dattan agl codesch er en maletg singular. Egn da chels hotels sa catta a Coira noua tgi igl viadi cuagl tren istoric ò scumanzo ier. Chegl è igl hotel Steila, ena tgesa tgi totga gio decennis tar egna dallas miglras dalla capitala grischuna. Ena adressa tgi marscha puspe fitg bagn è igl hotel istoric 2012, igl «Kurhaus» da Barvogn, tgi Maya e Christoph Steiner magnan cun fitg blera amour. An Nagiadegna on igls autours gist catto ples tgesas tgi on l'onour da cumpareir aint igl codesch «Zeitreisen». Chegl èn eneda igl hotel

Chesa Salis a Bever tgi ò en character fitg personal e tgi Jürg e Sybilla Degiacomi tgeran cun bler cor. Ena tradiziun da passa 100 onns on alloura igl hotel Palace a Son Murezza ed igl hotel «Waldhaus» a Segl, tgesas tgi totgan schizont tar las miglras digl antier mond. Cunzont igl hotel «Waldhaus» è igl migler exaimpel per en bun travagl da famiglia, èn las famiglias Kienberger e Dietrich hospitanas da vaglia. Aint igl codesch è dantant er da liger bler digl hotel Margna a Son Murezza tgi è ena buna tgesa da quatter steilas. A Soglio èn igls dus autours stogs giast aint igl hotel Palazzo Salis, en biets tgi datescha digl 1630. Pero er an Val Müstair on Ursula Bauer e Jürg Frischknecht catto da chellas tgesas cun ena gronda tradiziun e chegl èn igl hotel «Münsterhof» a Müstair ed igl hotel Chasa de Capol a Sta. Maria. En hotel vigl e bagn mantignia è alloura er igl hotel Albrici a Poschiavo tgi lavoura cunzont da premaveria anfignen alla fegn d'aton fitg bagn. Catto hotels digl stil floreal durant igl viadi tras la Svizra on la donna ed igl om tgi on scretg igl codesch sa tgapescha er a Flem. Egn da chels è igl hotel «Waldhaus» a Flem, actualmaintg igl pi nobel hotel dalla Surselva. En hotel da passa 130 onns cun ena buna clientela internaziunala. En object cun en agen stil è bagn er igl hotel «Schweizerhof» a Flem tgi è sto la tgesa paterna digl cineast Daniel Schmid. A Tavo è igl hotel «Schatzalp», en biets fitg marcant ed oz en hotel tgi totga er tar chels tgi èn renaschias. Igl madem vala per igls dus hotels Crousch Alva a Spleia e pigl Chesa Grischuna a Clostra.

Da retrer è igl codesch per en prietsch dad 82 francs sot l'adressa: www.swiss-historic-hotels.ch.



Ena tgesa cun bungs giasts e cun ena lunga istorgia è er igl hotel «Waldhaus» a Flem.



Magnan cun blera carezza igl hotel «Kurhaus»: Maya e Christoph Steiner.



Do igl vistgia musical alla vernissascha ò Domenic Janett.



Igl hotel «Kurhaus» a Barvogn, en hotel tgi è nia surdo igl 1903 agl travagl.



Treis hoteliers da treis bunas adressas: (da san.) Roland Schweizer, Margna, Son Murezza, Adrian K. Müller, Steila, Coira e Jürg Degiacomi, Chesa Salis, Bever.